

大般若波羅蜜多經卷第四百五十七

唐三藏法師玄奘奉 詔譯

第二分堅非堅品第六十四之二

諸天當知。諸色離。卽布施波羅蜜多乃至般若波羅蜜多離。受想行識離。卽布施波羅蜜多乃至般若波羅蜜多離。如是乃至諸色離。卽一切智智離。受想行識離。卽一切智智離。諸天當知。諸眼處離。卽布施波羅蜜多乃至般若波羅蜜多離。耳鼻舌身意處離。卽布施波羅蜜多乃至般若波羅蜜多離。如是乃至諸眼處離。卽一切智智離。耳鼻舌身意處離。卽一切智

智離。諸天當知。諸色處離。卽布施波羅蜜多。乃至般若波羅蜜多。離。聲香味觸法處離。卽布施波羅蜜多。乃至般若波羅蜜多。離。如是。乃至諸色處離。卽一切智智離。聲香味觸法處離。卽一切智智離。諸天當知。諸眼界離。卽布施波羅蜜多。乃至般若波羅蜜多。離。耳鼻舌身意界離。卽布施波羅蜜多。乃至般若波羅蜜多。離。如是。乃至諸眼界離。卽一切智智離。耳鼻舌身意界離。卽一切智智離。諸天當知。諸色界離。卽布施波羅蜜多。乃至般若波羅蜜多。離。聲香味觸法界離。卽布施波羅蜜多。離。如是。乃至般若波羅蜜多。離。如是。

乃至諸色界離。卽一切智智離。聲香味觸法界離。卽一切智智離。諸天當知。諸眼識界離。卽布施波羅蜜多。乃至般若波羅蜜多離。耳鼻舌身意識界離。卽布施波羅蜜多。乃至般若波羅蜜多離。如是乃至諸眼識界離。卽一切智智離。耳鼻舌身意識界離。卽一切智智離。諸天當知。諸眼觸離。卽布施波羅蜜多。乃至般若波羅蜜多離。耳鼻舌身意觸離。卽布施波羅蜜多。乃至般若波羅蜜多離。如是乃至諸眼觸離。卽一切智智離。耳鼻舌身意觸離。卽一切智智離。諸天當知。諸眼觸爲緣所生諸受離。卽布施波羅蜜多。乃至

般若波羅蜜多離。耳鼻舌身意觸爲緣所生諸受離。卽布施波羅蜜多乃至般若波羅蜜多離。如是乃至諸眼觸爲緣所生諸受離。卽一切智智離。耳鼻舌身意觸爲緣所生諸受離。卽一切智智離。諸天當知。諸地界離。卽布施波羅蜜多乃至般若波羅蜜多離。水火風空識界離。卽布施波羅蜜多乃至般若波羅蜜多離。如是乃至諸地界離。卽一切智智離。水火風空識界離。卽一切智智離。諸天當知。諸因緣離。卽布施波羅蜜多乃至般若波羅蜜多離。等無閒緣所緣緣增上緣離。卽布施波羅蜜多乃至般若波羅蜜多離。

如是乃至諸因緣離。卽一切智智離。等無閒緣所緣緣。增上緣離。卽一切智智離。諸天當知。諸無明離。卽布施波羅蜜多。乃至般若波羅蜜多離。行乃至老死離。卽布施波羅蜜多。乃至般若波羅蜜多離。如是乃至諸無明離。卽一切智智離。行乃至老死離。卽一切智智離。諸天當知。諸布施波羅蜜多離。卽內空乃至無性自性空離。淨戒安忍精進靜慮般若波羅蜜多離。卽一切智智離。淨戒安忍精進靜慮般若波羅蜜多離。卽一切智智離。諸天當知。諸內空離。卽

布施波羅蜜多乃至般若波羅蜜多離。外空乃至無
性自性空離。卽布施波羅蜜多乃至般若波羅蜜多
離。如是乃至諸內空離。卽一切智智離。外空乃至無
性自性空離。卽一切智智離。諸天當知。諸眞如離。卽
布施波羅蜜多乃至般若波羅蜜多離。法界乃至不
思議界離。卽布施波羅蜜多乃至般若波羅蜜多離。
如是乃至諸眞如離。卽一切智智離。法界乃至不思
議界離。卽一切智智離。諸天當知。諸苦聖諦離。卽布
施波羅蜜多乃至般若波羅蜜多離。集滅道聖諦離。
卽布施波羅蜜多乃至般若波羅蜜多離。如是乃至

諸苦聖諦離。卽一切智智離。集滅道聖諦離。卽一切智智離。諸天當知。諸四念住離。卽布施波羅蜜多。乃至般若波羅蜜多離。四正斷乃至八聖道支離。卽布施波羅蜜多。乃至般若波羅蜜多離。如是乃至諸四念住離。卽一切智智離。四正斷乃至八聖道支離。卽一切智智離。諸天當知。諸四靜慮離。卽布施波羅蜜多。乃至般若波羅蜜多離。如是乃至諸四靜慮離。卽一切智智離。四無量四無色定離。卽一切智智離。諸天當知。諸八解脫離。卽布施波羅蜜多。乃至

至般若波羅蜜多離。八勝處九次第定十遍處離。卽
布施波羅蜜多乃至般若波羅蜜多離。如是乃至諸
八解脫離。卽一切智智離。八勝處九次第定十遍處
離。卽一切智智離。諸天當知。諸空解脫門離。卽布施
波羅蜜多乃至般若波羅蜜多離。無相無願解脫門
離。卽布施波羅蜜多乃至般若波羅蜜多離。如是乃
至諸空解脫門離。卽一切智智離。無相無願解脫門
離。卽一切智智離。諸天當知。諸淨觀地離。卽布施波
羅蜜多乃至般若波羅蜜多離。種性地乃至如來地
離。卽布施波羅蜜多乃至般若波羅蜜多離。如是乃

至諸淨觀地離。卽一切智智離。種性地乃至如來地離。卽一切智智離。諸天當知。諸極喜地離。卽布施波羅蜜多乃至般若波羅蜜多離。離垢地乃至法雲地離。卽布施波羅蜜多乃至般若波羅蜜多離。如是乃至諸極喜地離。卽一切智智離。離垢地乃至法雲地離。卽一切智智離。諸天當知。諸陀羅尼門離。卽布施波羅蜜多乃至般若波羅蜜多離。三摩地門離。卽布施波羅蜜多乃至般若波羅蜜多離。如是乃至諸陀羅尼門離。卽一切智智離。三摩地門離。卽一切智智離。諸天當知。諸五眼離。卽布施波羅蜜多乃至般若

波羅蜜多離。六神通離。卽布施波羅蜜多乃至般若
波羅蜜多離。如是乃至諸五眼離。卽一切智智離。六
神通離。卽一切智智離。諸天當知。諸如來十力離。卽
布施波羅蜜多乃至般若波羅蜜多離。四無所畏。乃
至十八佛不共法離。卽布施波羅蜜多乃至般若波
羅蜜多離。如是乃至諸如來十力離。卽一切智智離。
四無所畏。乃至十八佛不共法離。卽一切智智離。諸
天當知。諸三十二大士相離。卽布施波羅蜜多乃至
般若波羅蜜多離。八十隨好離。卽布施波羅蜜多乃
至般若波羅蜜多離。如是乃至諸三十二大士相離。

卽一切智智離。八十隨好離。卽一切智智離。諸天當
知諸無忘失法離。卽布施波羅蜜多乃至般若波羅
蜜多離。恆住捨性離。卽布施波羅蜜多乃至般若波
羅蜜多離。如是乃至諸無忘失法離。卽一切智智離。
恆住捨性離。卽一切智智離。諸天當知。諸一切智離。
卽布施波羅蜜多乃至般若波羅蜜多離。道相智一
切相智離。卽布施波羅蜜多乃至般若波羅蜜多離。
如是乃至諸一切智離。卽一切智智離。道相智一切
相智離。卽一切智智離。諸天當知。諸預流果離。卽布
施波羅蜜多乃至般若波羅蜜多離。一來果乃至獨

覺菩提離。卽布施波羅蜜多乃至般若波羅蜜多離。
如是乃至諸預流果離。卽一切智智離。一來果乃至
獨覺菩提離。卽一切智智離。諸天當知。諸菩薩摩訶
薩行離。卽布施波羅蜜多乃至般若波羅蜜多離。如
是乃至諸菩薩摩訶薩行離。卽一切智智離。諸天當
知。諸佛無上正等菩提離。卽布施波羅蜜多乃至般
若波羅蜜多離。如是乃至諸佛無上正等菩提離。卽
一切智智離。諸天當知。諸一切智智離。卽布施波羅
蜜多乃至般若波羅蜜多離。如是乃至諸一切智智
離。卽諸佛無上正等菩提離。諸天當知。若菩薩摩訶

薩聞說諸法無不遠離。其心不驚。不恐。不怖。不憂。不悔。不沈。不沒。當知是菩薩摩訶薩。行深般若波羅蜜多。爾時世尊告善現言。何因緣故。諸菩薩摩訶薩。於深般若波羅蜜多。不沈。不沒。具壽善現白言。世尊。以一切法皆非有故。皆遠離故。皆寂靜故。無所有故。無生滅故。諸菩薩摩訶薩。於深般若波羅蜜多。不沈。不沒。世尊。由如是等種種因緣。諸菩薩摩訶薩。於深般若波羅蜜多。不沈。不沒。所以者何。諸菩薩摩訶薩。於一切法。若能沈沒。若所沈沒。若沈沒時。若沈沒處。若沈沒者。由此沈沒。皆不可得。以一切法不可得故。世

尊若菩薩摩訶薩。聞如是說。其心不驚。不恐不怖。不
憂不悔。不沈不沒。當知是菩薩摩訶薩。行深般若波
羅蜜多。何以故。是菩薩摩訶薩。觀一切法皆不可得。
不可施設。是能沈沒。是所沈沒。是沈沒時。是沈沒處。
是沈沒者。由此沈沒。以是因緣。諸菩薩摩訶薩。聞如
是說。其心不驚。不恐不怖。不憂不悔。不沈不沒。世尊。
若菩薩摩訶薩。能如是行。甚深般若波羅蜜多。諸天
帝釋。大梵天王。諸眾生主。恆共禮敬。佛告善現。若菩
薩摩訶薩。能如是行。甚深般若波羅蜜多。非但恆爲
諸天帝釋。大梵天王。諸眾生主。共所禮敬。是菩薩摩

訶薩亦爲過此極光淨天。若遍淨天。若廣果天。若淨居天。及餘天眾恆共禮敬。是菩薩摩訶薩。亦爲十方無量無數無邊世界。一切如來應正等覺現說法者。恆共護念。善現。當知是菩薩摩訶薩。能如是行甚深般若波羅蜜多故。則令布施波羅蜜多乃至般若波羅蜜多。速得圓滿。亦令內空乃至無性自性空。速得圓滿。亦令眞如乃至不思議界。速得圓滿。亦令苦集滅道聖諦。速得圓滿。亦令四念住乃至八聖道支。速得圓滿。亦令四靜慮。四無量。四無色定。速得圓滿。亦令八解脫。乃至十遍處。速得圓滿。亦令空無相無願。

解脫門。速得圓滿。亦令極喜地乃至法雲地。速得圓滿。亦令一切陀羅尼門三摩地門。速得圓滿。亦令五眼六神通。速得圓滿。亦令如來十力乃至十八佛不共法。速得圓滿。亦令無忘失法恆住捨性。速得圓滿。亦令一切智道相智一切相智。速得圓滿。亦令一切菩薩摩訶薩行。速得圓滿。亦令諸佛無上正等菩提。速得圓滿。亦令一切智智。速得圓滿。善現。當知若菩薩摩訶薩。能如是行甚深般若波羅蜜多。常爲如來應正等覺及諸菩薩摩訶薩眾。其所護念。速能圓滿一切功德。是菩薩摩訶薩。當知行佛所應行處。亦正

修行佛所行行。故此菩薩如佛世尊。善現。當知是菩薩摩訶薩。其心堅固。假使十方。旃伽沙等諸佛世界。一切有情。皆爲惡魔。一一惡魔。各復化作爾許惡魔。此諸惡魔。皆有無量無邊神力。是諸惡魔。盡其神力。不能障礙。是菩薩摩訶薩。令不能行甚深般若波羅蜜多。不證無上正等菩提。所以者何。是菩薩摩訶薩。已得般若波羅蜜多方便善巧。達一切法不可得故。善現。若菩薩摩訶薩。成就二法。一切惡魔不能障礙。令不能行甚深般若波羅蜜多。不證無上正等菩提。云何爲二。一觀諸法皆畢竟空。二不棄捨一切有情。

善現。若菩薩摩訶薩。成就二法。一切惡魔不能障礙。令不能行甚深般若波羅蜜多。不證無上正等菩提。云何爲二。一如所說。悉皆能作。二爲諸佛常所護念。善現。若菩薩摩訶薩。能如是行甚深般若波羅蜜多。諸天神等。常來禮敬。親近供養。請問勸發。作如是言。善哉大士。欲證無上正等菩提。當勤住空。無相。無願。所以者何。大士。若菩薩摩訶薩。精勤住空。無相。無願。一切有情。無依怙者。能作依怙。無歸依者。能作歸依。無救護者。能作救護。無投趣者。能作投趣。無洲渚者。能作洲渚。無舍宅者。能作舍宅。與闇冥者。能作光明。

與聾盲者能作耳目。何以故。大士如是住空無相無願。卽爲安住甚深般若波羅蜜多。若能安住甚深般若波羅蜜多。疾證無上正等菩提。善現。若菩薩摩訶薩。能如是住甚深般若波羅蜜多。便爲十方無量無數無邊世界。現在如來應正等覺處。大眾中說正法時。自然歡喜。稱揚讚歎。是菩薩摩訶薩。名字種姓及諸功德。所謂安住甚深般若波羅蜜多微妙功德。善現。當知如我今者。爲眾宣說甚深般若波羅蜜多。於大眾前。自然歡喜。稱揚讚歎。寶幢菩薩摩訶薩。頂髻菩薩摩訶薩等。諸菩薩摩訶薩。及餘現在不動佛所。

淨修梵行。安住般若波羅蜜多諸菩薩摩訶薩。名字
種姓及諸功德。所謂安住甚深般若波羅蜜多微妙
功德。現在東方殑伽沙等諸佛世界。一切如來應正
等覺。爲眾宣說甚深般若波羅蜜多。於彼亦有諸菩
薩摩訶薩。淨修梵行。安住般若波羅蜜多。彼諸如來
應正等覺。各於眾前。自然歡喜。稱揚讚歎彼菩薩摩
訶薩。名字種姓及諸功德。所謂安住甚深般若波羅
蜜多微妙功德。南西北方四維上下殑伽沙等諸佛
世界。一切如來應正等覺。爲眾宣說甚深般若波羅
蜜多。於彼亦有諸菩薩摩訶薩。淨修梵行。安住般若

波羅蜜多。彼諸如來應正等覺。各於眾前。自然歡喜。稱揚讚歎。彼菩薩摩訶薩。名字種姓及諸功德。所謂安住甚深般若波羅蜜多微妙功德。善現。當知有菩薩摩訶薩。從初發心。修行般若波羅蜜多。漸次圓滿。大菩提道。漸次圓滿。甚深般若波羅蜜多。乃至當得一切智智。亦爲十方殑伽沙等諸佛世界。一切如來應正等覺。說正法時。於大眾前。自然歡喜。稱揚讚歎。是菩薩摩訶薩。名字種姓及諸功德。所謂修行甚深般若波羅蜜多微妙功德。何以故。善現。是菩薩摩訶薩。能爲難事。不斷佛種。饒益有情。爾時具壽善現白。

佛言。世尊。何等菩薩摩訶薩。爲諸如來應正等覺說正法時。在大眾前。自然歡喜。稱揚讚歎名字種姓及諸功德。爲不退轉。退轉位耶。佛告善現。有菩薩摩訶薩。住不退轉位。修行般若波羅蜜多。爲諸如來應正等覺說正法時。在大眾前。自然歡喜。稱揚讚歎名字種姓及諸功德。復有菩薩摩訶薩。雖未受記。而行般若波羅蜜多。亦爲如來應正等覺說正法時。在大眾前。自然歡喜。稱揚讚歎名字種姓及諸功德。爾時善現。復白佛言。此所說者。是何菩薩。佛告善現。有菩薩摩訶薩。隨不動佛爲菩薩時。所行而學。已得安住不

退轉地。是菩薩摩訶薩。爲諸如來應正等覺說正法時。在大眾前。自然歡喜。稱揚讚歎名字種姓及諸功德。復有菩薩摩訶薩。隨寶幢菩薩摩訶薩頂髻菩薩摩訶薩等所行而學。是菩薩摩訶薩。雖未受記。而勤精進。行深般若波羅蜜多。亦爲如來應正等覺說正法時。在大眾前。自然歡喜。稱揚讚歎名字種姓及諸功德。復次。善現有菩薩摩訶薩。行深般若波羅蜜多。於一切法無生性中。雖深信解。而未證得無生法忍。於深般若波羅蜜多。雖深信解。而亦未得無生法忍。於一切法畢竟空性。雖深信解。而亦未得無生法忍。

於一切法皆寂靜性。雖深信解。而亦未得無生法忍。
於一切法皆遠離性。雖深信解。而亦未得無生法忍。
於一切法皆虛妄性。雖深信解。而亦未得無生法忍。
於一切法皆是空性。雖深信解。而亦未得無生法忍。
於一切法無所有性。雖深信解。而亦未得無生法忍。
於一切法不自在性。雖深信解。而亦未得無生法忍。
於一切法不堅實性。雖深信解。而亦未得無生法忍。
善現。如是等菩薩摩訶薩。亦爲如來應正等覺說正
法時。在大眾前。自然歡喜。稱揚讚歎名字種姓及諸
功德。善現。若菩薩摩訶薩。爲諸如來應正等覺說正

法時在大眾前自然歡喜。稱揚讚歎名字種姓及諸功德。是菩薩摩訶薩。超諸聲聞獨覺等地。定得無上正等菩提。善現。若菩薩摩訶薩。行深般若波羅蜜多。爲諸如來應正等覺說正法時。在大眾前自然歡喜。稱揚讚歎名字種姓及諸功德。是菩薩摩訶薩。定當安住不退轉地。住是地已。速證無上正等菩提。復次善現。若菩薩乘諸善男子善女人等。聞說如是甚深般若波羅蜜多。所有義趣無疑無惑。不迷不悶。但作是念。如佛所說甚深般若波羅蜜多。其理必然。定無顛倒。是善男子善女人等。由聞般若波羅蜜多。深生

淨信。漸次當於不動佛所。及諸菩薩摩訶薩所。廣聞般若波羅蜜多。於其義趣深生信解。既信解已。當得住於不退轉地。住是地已。疾證無上正等菩提。善現。是菩薩乘諸善男子善女人等。但聞如是甚深般若波羅蜜多。無疑無惑。不迷不謬。深生信解。不生誹謗。尙獲無量微妙善根。況能受持讀誦通利。依真如理。繫念思惟。安住真如。精勤修學。是善男子善女人等。速當安住不退轉地。疾證無上正等菩提。轉妙法輪。度有情眾。爾時具壽善現白佛言。世尊。諸法實性。竟不可得。云何可說諸菩薩摩訶薩。安住真如。精勤修

學。速當安住不退轉地。疾證無上正等菩提。轉妙法
輪。度有情眾。佛告善現。如佛所化。安住眞如修菩薩
行。速當安住不退轉地。疾證無上正等菩提。轉妙法
輪。度有情眾。諸菩薩摩訶薩。亦復如是。安住眞如修
菩薩行。速當安住不退轉地。疾證無上正等菩提。轉
妙法輪。度有情眾。具壽善現。復白佛言。如來所化。都
無所有。法離眞如亦不可得。誰住眞如修菩薩行。誰
當安住不退轉地。誰證無上正等菩提。誰轉法輪。說
何等法。度何等眾。世尊。眞如尙不可得。何況得有安
住眞如修菩薩行。速當安住不退轉地。疾證無上正

等菩提轉妙法輪度有情眾。此若實有。必無是處。佛告善現。如是如是。如汝所說。如來所化。都無所有。法離眞如。亦不可得。誰住眞如。修菩薩行。誰當安住。不退轉地。誰證無上正等菩提。誰轉法輪。說何等法。度何等眾。善現。眞如尙不可得。何況得有安住眞如。修菩薩行。速當安住。不退轉地。疾證無上正等菩提。轉妙法輪。度有情眾。此若實有。必無是處。所以者何。善現。諸佛出世。若不出世。諸法法爾。不離眞如。廣說乃至不思議界。善現。決定無有安住眞如。修菩薩行。廣說乃至度有情眾。何以故。善現。諸法眞如。無生無滅。

亦無住異少分可得。善現。若法無生無滅。亦無住異少分可得。誰住其中修菩薩行。誰當安住不退轉地。誰證無上正等菩提。誰轉法輪。說何等法。度何等眾。此中一切都無所有。此若實有。定無是處。但依世俗假施設有。爾時天帝釋白佛言。世尊。如是般若波羅蜜多。最極甚深。難信難解。諸菩薩摩訶薩。行深般若波羅蜜多。雖知諸法皆不可得。而求無上正等菩提。欲爲有情宣說正法。甚爲難事。何以故。世尊。決定無有安住眞如修菩薩行。證得無上正等菩提。爲諸有情說正法事。而諸菩薩摩訶薩。行深般若波羅蜜多。

觀一切法都無所有。於深法性。其心不驚。不恐不怖。無疑無滯。不沈不沒。亦不迷悶。如是等事。甚爲希有。爾時善現。語帝釋言。憍尸迦。如汝所說。諸菩薩摩訶薩。行深般若波羅蜜多。觀一切法都無所有。於深法性。其心不驚。不恐不怖。無疑無滯。不沈不沒。亦不迷悶。如是等事。甚希有者。憍尸迦。諸菩薩摩訶薩。行深般若波羅蜜多。觀一切法本性皆空。於此空中。都無所有。誰可驚恐。乃至迷悶。是故菩薩行深般若波羅蜜多。於深法性。其心不驚。不恐不怖。無疑無滯。不沈不沒。不迷不悶。未爲希有。時天帝釋白善現言。大德。

所說一切依空。是故所言常無罣礙。譬如以箭仰射虛空。若遠若近。俱無罣礙。大德所說亦復如是。誰能於中而敢抗對。

第二分實語品第六十五之一

爾時天帝釋白佛言。世尊。我如是說。如是讚。如是記。爲順世尊實語法語。於法隨法爲正記。不。時佛告言。憍尸迦。汝如是說。如是讚。如是記。諒順世尊實語法語。於法隨法誠爲正記。時天帝釋復白佛言。希有世尊。大德善現。諸有所說。一切依空。無相無願。亦依四念住。乃至八聖道支。亦依四靜慮。四無量。四無色定。

亦依八解脫乃至十遍處。亦依苦集滅道聖諦。亦依
布施波羅蜜多乃至般若波羅蜜多。亦依內空乃至
無性自性空。亦依眞如乃至不思議界。亦依菩薩摩
訶薩地。亦依一切陀羅尼門三摩地門。亦依五眼六
神通。亦依如來十力乃至十八不共法。亦依無忘
失法。恆住捨性。亦依一切智道相智一切相智。亦依
一切菩薩摩訶薩行。亦依諸佛無上正等菩提。爾時
佛告天帝釋言。憍尸迦。具壽善現。住諸法空。觀布施
波羅蜜多乃至般若波羅蜜多。尙不可得。況有行布
施波羅蜜多乃至般若波羅蜜多者。可得。觀四念住

乃至八聖道支。尙不可得。況有修四念住。乃至八聖道支者。可得。觀四靜慮。四無量。四無色定。尙不可得。況有修四靜慮。四無量。四無色定者。可得。觀八解脫。乃至十遍處。尙不可得。況有修八解脫。乃至十遍處者。可得。觀苦集滅道聖諦。尙不可得。況有住苦集滅道聖諦者。可得。觀內空。乃至無性自性空。尙不可得。況有住內空。乃至無性自性空者。可得。觀眞如。乃至不思議界。尙不可得。況有住眞如。乃至不思議界者。可得。觀空無相無願解脫門。尙不可得。況有修空無相無願解脫門者。可得。觀極喜地。乃至法雲地。尙不

可得。況有修極喜地乃至法雲地者可得。觀一切陀羅尼門三摩地門。尙不可得。況有修一切陀羅尼門三摩地門者可得。觀五眼六神通。尙不可得。況有引發五眼六神通者可得。觀如來十力乃至十八佛不共法。尙不可得。況有引發如來十力乃至十八佛不共法者可得。觀無忘失法。恆住捨性。尙不可得。況有引發無忘失法。恆住捨性者可得。觀一切智道相智。一切相智。尙不可得。況有引發一切智道相智。一切相智者可得。觀一切菩薩摩訶薩行。尙不可得。況有能行一切菩薩摩訶薩行者可得。觀諸佛無上正等

菩提。尚不可得。況有能證諸佛無上正等菩提者。可得。觀一切智智。尚不可得。況有能得一切智智者。可得。觀正法輪。尚不可得。況有能轉正法輪者。可得。觀三十二大士相八十隨好。尚不可得。況有以此相好莊嚴身者。可得。觀無生無滅法。尚不可得。況有能證無生無滅法者。可得。何以故。憍尸迦。具壽善現。於一切法。住遠離住。住寂靜住。住無所有住。住無所得住。住空住。住無相住。住無願住。憍尸迦。具壽善現。於一切法。住如是等無量勝住。憍尸迦。善現。所住無量勝住。比諸菩薩摩訶薩眾。所住般若波羅蜜多甚深行。

住。百分不及一。千分不及一。百千分不及一。乃至卽
波尼殺曇分。亦不及一。何以故。憍尸迦。除如來住。是
諸菩薩摩訶薩眾。所住般若波羅蜜多甚深行住。於
諸聲聞獨覺等住。爲最爲勝。爲尊爲高。爲妙爲微妙。
爲上爲無上。無等無等等。以是故。憍尸迦。若菩薩摩
訶薩。欲住一切有情上者。應住般若波羅蜜多甚深
行住。何以故。憍尸迦。諸菩薩摩訶薩。住此住中。超諸
聲聞獨覺等地。證入菩薩正性離生。能速圓滿一切
佛法。永斷煩惱習氣相續。能疾證得一切智智。得名
如來應正等覺。能常利樂一切有情。爾時眾中。有無

量無數三十三天。聞佛所說。踊躍歡喜。各取天上微妙香華。奉散如來。及苾芻眾。是時眾內六百苾芻。從座而起。頂禮佛足。偏覆左肩。右膝著地。曲躬恭敬。合掌向佛。瞻仰尊顏。目不暫捨。佛神力故。各於掌中。微妙香華。自然盈滿。是苾芻眾。歡喜踊躍。得未曾有。各持此華。而散佛上。及諸菩薩。既散華已。咸發願言。我等用斯勝善根力。願常安住。甚深般若波羅蜜多。微妙行住。聲聞獨覺。所不能住。速趣無上正等菩提。超諸聲聞獨覺等地。爾時世尊。知苾芻眾。增上意樂。趣大菩提。定不退轉。即便微笑。如佛常法。從其面門。放

種種光。青黃赤白。紅紫碧綠。金銀頗胝。遍照三千大千世界。其光漸攝。還遶佛身。經三市已。從頂上入。爾時慶喜。既覩斯瑞。歡喜踊躍。卽從座起。禮佛合掌。白言。世尊。何因何緣。現此微笑。諸佛現笑。非無因緣。惟願如來哀愍爲說。佛告慶喜。是苾芻衆。於未來世。星喻劫中。當得作佛。同號散華如來。應正等覺。明行圓滿。善逝世間。解無上丈夫。調御士。天人師。佛。薄伽梵。彼佛壽量。所居國土。苾芻弟子。一切皆同。是諸如來。應正等覺。初生出家。及成佛後。隨所在處。若晝若夜。常雨五色微妙香華。以是因緣。故我微笑。是故慶喜。

若菩薩摩訶薩。欲得安住最勝住者。當行般若波羅蜜多。若菩薩摩訶薩。欲得安住如來住者。當行般若波羅蜜多。慶喜當知。若善男子善女人等。精勤修學甚深般若波羅蜜多。是善男子善女人等。先世或從人中沒已。還生此處。或從覩史多天。上沒來生人中。彼於先世。或在人間。或居天上。由曾廣聞甚深般若波羅蜜多。故於今世。能勤修學甚深般若波羅蜜多。慶喜當知。如來現見。若善男子善女人等。能勤修學甚深般若波羅蜜多。於身命財無所顧者。定是菩薩摩訶薩也。

大般若波羅蜜多經卷第四百五十七

音釋

依怙

怙音戶恃也

聾盲

聾盧紅切耳無聞也盲眉庚切目無瞳子也

抗對

抗

浪切抗抵也敵也

踊躍

踊音勇跳也躍弋約切舉身而上為躍